

四庫全書

集部

欽定四庫全書

文章辨體彙選卷二百五十五

明 賀復徵 編

書五十一

在北齊與楊僕射書

陳徐陵

陵叩頭叩頭夫一言所感凝暉照於魯陽一志冥通飛  
泉涌于疏勒况復元首康哉股肱良哉隣國相聞風教  
相期者也天道窮剥鍾亂本朝情計馳惶公私哽懼而

骸骨之請徒淹歲寒顛沛之祈空盈卷軸是所不圖也  
非所仰望也執事不聞之乎昔分鼇命鴈之世觀河拜  
洛之年則有日烏流災風禽騁暴天傾西北地缺東南  
盛早圻三川長波含五嶽我大梁膺金圖而有亢纂玉  
鏡而猶屯何則聖人不能為時斯固窮通之恒理也至  
如荊州刺史湘東王幾神之本無寄名言陶鑄之餘猶  
為堯舜雖復六代之舞陳于總章九州之歌登于司樂  
虞夔拊石晉曠調鐘未足頌此英聲無以宣其盛德者

也若使郊裡楚翼寧非祀夏之君哉定艱難便是匡周  
之霸豈徒幽王徒雍棊月為都姚帝遷河周年成邑方  
今越裳藐藐馴雉北飛肅慎茫茫風牛南偃吾君之子  
含識知歸而荅旨云何所投身斯其未喻一也又晉熙  
等郡皆入貴朝去我潯陽經塗何幾至于鎬鎬曉漏的  
的宵烽隔淑浦而相聞臨高臺而可望泉流寶蓋遙意  
湓城峰號香爐依然盧嶽日者鄱陽嗣王治兵滙派屯  
戍淪波朝夕牋書春秋方物吾無從以躡屩彼何路

而齊鑣豈其然乎斯不然矣又近者邵陵王通和此國  
郢中上客雲聚魏都鄴下名卿風馳南浦豈盧龍之徑  
於彼新開銅駝之街於我長閉何彼途甚易非勞于五  
丁我路為難如登於九折地不私載何其爽歟而荅旨  
云還路無從斯所未喻二也晉熙廬江義陽安陸皆云  
疑附非復危邦計彼中途便當靜晏自斯以北桴鼓不  
鳴自此以南封疆未一如其境外脫殞輕軀幸非邊吏  
之羞何在匹夫之命又此段賓遊通無貨殖忝非韓起

聘鄭私買玉環吳札過徐躬要寶劍由來宴錫几厥囊  
裝行沒淹留皆已虛罄散有限之微財供無期之久客  
斯可知矣且據圖刳首愚者不為運斧全身庸流所鑒  
何則生輕一髮自重千鈞不以賈盜明矣骨肉不任充  
鼎俎皮毛不足入貨財盜有道焉吾無憂矣又公家遣  
使脫有資須本朝非隆平之時遊客豈皇華之勢輕裝  
獨宿非勞聚櫟之儀微騎閒行寧望輜軒之禮歸人將  
從私具驢騾緣道亭郵唯希蔬粟若曰留之無煩于執

事遣之有費于官司或以顛沛為言或云資裝可懼固非  
通論皆是外篇斯所未喻三也又若以吾徒應還侯景  
侯景凶逆殲我國家天下含靈人懷憤厲既不能投身  
社稷衛難乘輿三冢磔蚩尤十刀剗王莽安所謂俛首  
頓膝歸奉寇讐佩弭腰鞬為其皂隸日者通和方敦曩  
睦凶人駟詐遂駭狼心頗疑宋萬之誅彌懼荀瑩之請  
所以奔蹄勁角專恣憑陵凡我行人偏膺讐憾政復殖  
筋醢骨抽舌探肝於彼凶情猶當未雪海內之所知也

君侯之所具焉又聞本朝王公都人士女風行雨散東  
播西流京邑丘墟蒺藜蕭瑟偃師還望咸為草萊霸陵  
回首俱沾霜露此又君之所知也彼以何義爭免冠讐  
我以何親爭歸委質昔鉅平貴將懸重于陸公叔向名  
流深知于驂茂吾雖不敏常慕前修不圖明庶有懷翻  
其以此量物昔魏氏將士羣凶挺爭諸賢戮力想得其  
朋為葛榮之黨邪為邢杲之徒邪如曰不然斯所未喻  
四也假使吾徒還為凶黨侯景生于趙代家自幽恒居



則台司行為連率山川行勢軍國彛章不勞請箸為籌  
便當屈指能筭重以逋逃小醜羊豕同羣身寓江臯家  
留河朔春春井井如鬼如神其不然乎抑又君之所知  
也且夫宮闈秘事並若雲霄英俊訐謨寧非幃幄或陽  
驚以定策或焚藁而奏書朝廷之上猶難參預羈旅之  
人何階耳目至於禮樂沿革刑政寬猛則謳歌已遠萬  
舞成風不知手之舞之足之蹈之也安在搖其牙齒為  
間諜者哉若謂復命西朝終奔東虜雖齊梁有隔尉候

奚殊豈以河曲之難浮而曰江關之可濟河橋馬度寧  
非宋典之姦關路雞鳴皆是田文之客何其通蔽乃爾  
相妨斯所未喻五也又兵交使在雖著前經儻同徇僕  
之尤追肆寒山之怒則凡諸元帥並釋縲囚爰及偏裨  
同無翦馘乃至鍾儀見赦朋笑遵途襄老蒙歸虞歌引  
路吾等張旛拭玉修好尋盟涉泗之與浮河郊勞至于  
贈賄公恩既被賓敬無違今者何憊翻蒙貶責若以此  
為言斯所未喻六也若曰妖氛永久喪亂悠然哀我奔

波存其形魄固已銘茲厚德戴此洪恩譬渤澥而俱深  
方嵩華而猶重但山梁飲啄非有意于樊籠江海飛浮  
本無情于鐘鼓况吾等營魂已謝餘息空留悲默為生  
何能支久是則雖蒙養護更夫天年若以此為言斯所  
未喻七也若云逆豎殲夷當聽反命高軒繼路飛蓋相  
隨未解其言何能善譴夫屯亨治亂豈有意于前期謝  
常侍今年五十有一吾今年四十有四介已知命賓又  
杖鄉計彼后生肩隨而已豈銀臺之要彼未從師金甌

之方吾知其訣政恐南陽菊水竟不延齡東海桑田無  
由佇望若以此為言斯所未喻八也足下清襟勝託書  
囿文林凡自洪荒終乎幽厲如吾今日寧有其人爰至  
春秋微宜商略夫宗姬殄陞霸道昏凶或執政之多門  
或陪臣之涼德故臧孫有禮翻囚與國之賓周伯無憊  
空怒天王之使遷箕卿于兩館繫驥子于三年斯匪貪  
亂之風邪寧當今之高例也至于雙嶠且帝四海爭雄  
或構趙而侵燕或連韓而謀魏身求盟于楚殿躬奪璧

于秦庭輸寶鼎以託齊王馳安車而誘梁客其外膏唇敗  
舌分路揚鑣無罪無辜如兄如弟逮乎中陽受命天下  
同規巡省諸華無聞幽辱及三方之霸也孫甘言以斌  
媚曹屈詐以羈縻終軫歲到于句吳冠蓋年馳于庸蜀  
則客嘲殊險賓戲已深共盡遊談誰云猜忤若使搜求  
故寔脫有前蹤恐是叔世之姦謀而非為邦之勝畧也  
抑又聞之雲師火帝澆淳乃異其風龍躍麟驚王霸雖  
殊其道莫不崇君親以詔物敦敬養以治民預有邦司

曾無隆替吾奉違溫清仍屬亂離寇猖狂公私播越  
蕭軒靡御王舫誰持瞻望鄉關何心天地自非生憑廩  
竹源出空桑行路含情猶其相愍嘗謂擇官而仕非曰  
孝家擇事而趨非云忠國況乎欽承有道驂駕前王郎  
吏明經鵠鳶知禮巡方省化咸問高年東序西膠皆尊  
耆耄吾以圭璋玉帛通聘來朝屬世道之屯期鍾生民  
之否運蕪年累載無申元直之祈銜泣吞聲長對公閭  
之怒情理之訴將同逆鱗忠孝之言皆應斷舌是所不

圖也非所仰望也且天倫之愛何得忘懷妻子之情誰能無累夫以清河公主之貴餘姚書佐之家莫限高卑皆被驅畧自東南醜虜抄販饑民臺署郎官俱餒墻壁况吾生離死別多歷暄寒孀室嬰兒何可言念如得身還鄉土躬自推求猶冀提携俱免凶虐夫四聰不達華陽君所謂亂臣百姓無冤孫叔敖稱為良相足下高才重譽參贊經綸非虎非貔聞詩聞禮而中朝大議曾未矜論清禁嘉謀安能相及諤諤非周舍容容類胡廣何

其無諍臣哉歲月如流平生何幾晨看旅雁心赴江淮  
昏望牽牛情馳揚越朝千悲而掩泣夜萬緒而回腸不  
自知其為生不自知其為死也足下素挺詞鋒兼長理  
窟匡丞相解頤之說樂令君清耳之談向所諮疑誰能  
曉諭若鄙言為戮來旨必通分請灰釘甘從斧鑊何但  
規規默默齟舌低頭而已哉若一理存焉猶希矜眷何  
必期令我等必死齊都足趙魏之黃塵加幽并之片骨  
遂使東平拱樹長懷向漢之悲西洛孤墳恒表思鄉之



夢干祈以屢哽動增深徐陵叩頭再拜

在北齊與宗室書

徐陵

陵白臨淮負海是謂徐州顓頊高陽世有明德自  
興王啟霸無勞委劍之鋒開國承家寔饗彤弓之  
賜其後金柯玉葉雷振雲從耆舊通人茂才多士  
或以天下之貴負石自沉王命之尊拂衣高蹈或  
熊衣雉製青組朱旗儒盛江東文高河北或復分  
齊處魯移魏居燕爪爬雖遙芳枝無遠昔有王郎

王莽無關控鵠之宗劉曜劉淵彌非偃龍之族又有朱家別錄邾子之苗何氏殊源韓侯之肩三烏五鹿時事無恒東郭西門遷訛非一吾宗雖廣未有駢枝咸自駒王同分才子正以金衡委御玉斗宵亡外患憑陵中原傾覆我則供犧牲於東國載主祔於南都二百餘年家於揚越此則盧諶不去裴寧仍留高宦燕秦遲迴鄉壤山河有隔叙觀無緣望冀馬而增勞瞻賓鴻而永嘆昔竇公累世光

武稱其外家許都遙遠靈王思其舊宅其言雖大  
可以喻小況在宗親寧無停眷比月應雩龍星移  
殷鳥天明和煦體中何如願百年之老興居多福  
萬石之君寒暑清豫其外族忠孝比屋連甍信義  
勇于干戈詩書甘於酒醴或有漁獵三史紛綸五  
經都講開黌詩生負帙邦君佇德寧無掛榻之思  
州將欽風應有題車之命南陽坐嘯寄以共治東  
海行歌資其主弼梁竦不慧徒為大言鄧禹平生

唯望如此若栖遲偃仰因事丘中桃李三名栗園  
千樹持竿而釣徵聘不來負耒而耕公侯靡屈何  
其高也蓋復休哉如脫推延或遲竝問吾階緣人  
乏叨簪皇華玉事無淹公禮將畢既而揚都蕩覆  
方離獫狁之災越畧風塵復蹈輶軒之禮屏居空  
館多厯歲時疊犯靈祇招延禍罰號慕無窮肝膽  
屠殞煩冤胸臆不自堪居無心奈何無狀奈何自  
徘徊河朔亟積寒暄風患彌留半體枯廢折臂為

公雖非羊祜跛足而使無慙卻克固以形如槁木  
心若死灰匍匐苦廬纔有魂氣夫迷山之客遲遙  
響於巖崖窮海之賓望孤煙於洲嶼况乃宗均魯  
衛地匪燕吳車騎相望舟艫朝夕三條不遠五達  
非難信乃闊然遂不蒙問昔桃花之峽長避秦嬴  
芝草之山遙然滄海猶復漁船可入何況平途不  
兼旬月勞懷既積輒命行人弦望之間遲枉歸翰  
儻二三兄弟能敦昭穆之詩求我潼濱幸開劉楨

之疾陽春改節竝念將宜扶力為書多不詮次陵  
白

答尹義尚書

徐陵

別離二國雲雨十年心想河陽言銅爵而無遠神遊漳  
水與金鳳而俱飛弟留連河北義等周召懷此殊才寔  
可傷歎吾崦嵫既暮容鬢凋然風氣彌留砭藥無損追  
惟疇昔共脩行人家國安危賓禮陞降懸壺代哭俱歷  
春冬移館于箕同茲辛苦鳴蜩抱樹亟見藏冰歸雁銜

蘆多歷寒食靜言念此如何可忘夫以擁腫之木得免  
因子下才穀鯨之牛自保由于無用嗟余鄙陋未友龔  
生唯歎吾賢不同蘧瑗爾夫推溝拯溺每切皇衷逸翮  
飄鱗見優機覽所以降尺一之書馳輜軒之使心期與  
國必遂還途寧謂親隣更成難請伊昔梁朝共奉嘉聘  
張茲大帛處彼高閣庭奏歌鍾座延僑盼賓客之叙方  
於階阼田獵之禽同於君膳正以鄉關阻亂致爾拘留  
家國隆平義應旋反韓宣屢至宰孔頻還翻爾遲迴豈

云鄰睦

與李那書

徐陵

籍甚清徽常懷虛眷山川緬邈河渭像于經星顧望風  
流長安遠于朝日青女戒節白露為霜君子惟宜福履  
多豫雍容廊廟獻納便蕃留使催書駐馬成檄車騎將  
軍賓客盈座丞相長史瞻對有勞脫惠箋繒慰其翹想  
吾栖遲茂陵之下卧病漳水之濱迫於崦嵫難為砭藥  
平生壯意竊愛篇章忽覩高文載懷勞佇此後殷儀同



至止王人授館用阻班荆常在公筵敬析名作獲殷公所偕陪駕終南入重陽閣詩及荊州大乘寺宣陽石像碑四首鏗鏘並奏能驚趙鞅之魂輝煥相華時瞬安豐之眼山澤晦靄松竹參差若見三峻之峰依然四皓之廟甘泉鹵簿盡在清文扶風輦路悉陳華簡昔魏武虛帳韓王故臺自古文人皆為詞賦未有登茲舊閣嘆此幽宮標句清新發言哀斷豈止悲聞帝瑟泣望羊碑一詠歌梁之言便掩盈懷之淚至如披文相質意致縱橫

才壯風雲義深淵海方今二乘斯悟同免化城六道知  
歸皆踰火宅宣陽之作特會幽衿所觀黃絹之詞彌懷  
白雲之頌但恨耆闍遠嶽檀特高峰關士羅浮康公懸  
溜不獲銘茲雅頌耀彼幽巖循環省覽用忘飢渴握之  
不置恒如趙壁翫之不足同於玉枕京師長者好事才  
人爭造蓬門請觀高製軒車滿路如看太學之碑街巷  
相填無異華陰之市但豐城兩劍尚不俱來韓子雙環  
必希皆見莫以好龍無別木雁可嗤載望瓊瑤因乏行

李金風已勁玉質宜調書不盡言但聞交繫徐陵頓首

答周處士書

徐陵

辱去年三月二十七日告仰披華翰甚慰翹結承歸來  
天目得肆閒居差有弄玉之俱仙非無孟光之同隱優  
游俯仰極素女之經文升降盈虛盡軒皇之圖藝雖復  
考槃在阿不為獨宿詎勞金液唯飲玉泉比夫煮石紛  
紜終年不爛燒丹辛苦至老方成及其得道冥真何勞  
逸之相懸也又承有方生亦在天目理當仰稟明師總

斯秘要豈如張陵弟子自墜高巖孫泰門人竟投滄海  
何其樂乎聖朝虛心版築尚想丘園若彼能赴嘉招便  
當謹申高命但其人往歲亦望至京觀此風神確乎難  
拔故以忘懷爵祿詎持犧牲之談高視公卿獨騁蜡螳  
之訓所恐有道三辟公車十徵若斯者終當不屈此既  
然矣請復詳言昔楚國兩龔同時紆組漢陰二老相携  
抱甕兄之幽真若其鑿坏負石方同形影結綬彈冠無  
容越楚况乎糞土夔龍羶燥名器已所不欲非應及人

忽承來音良以多感何則潁陽巢父不曾令薦許由商  
洛園公未聞求徵綺季斯所未喻高懷而躊躇於矛楯  
也唯遲山阿近信更惠芳音如或誠言謹便聞奏第夙  
勞比劇不復多呈徐陵白

與徐孝穆書

李邕

繁霜應管能響豐山之鐘玄雲觸目又動流泉之奏矧  
伊物候且或冥符况乃矜期相忘道術楚齊風馬吳會  
浮雲行李無因音塵不嗣殷御正銜命來歸嘉言累札

江南橘茂薊北桑枯陰慘陽舒行止多福足下泰山竹  
箭浙水明珠海內風流江南獨步扶風計吏議折祥禽  
平陵李廉辨誦文約况復麗藻星鋪雕文錦縟風雲景  
物義盡緣情經綸憲章辭殫表奏久以京師紙貴天下  
家藏調移齊右之音韻改河西之俗豈真楊雲藻翰獨  
留千金嗣宗文雅唯傳好事僕世傳經術才謝劉歆家  
有賜書學非班嗣弱年有意頻愛雕蟲歲月三餘無忘  
肄業戶牖之間時安筆硯顰眉難巧學步非工恒經牧

孺之譏屢被陳思之誚羞逢仲子類君山之鼓琴屢見  
子將同本初之車服不謂殷侯虛談成價遂同布鼓輕  
響雷門燕石空雕終慙比德楚暈雖拂寔愧棲桐豈若  
邯鄲舉袖唯聞變曲協律飛塵必應不顧是以日南寶  
貝遙望歸秦合浦文犀更希還漢芳春行獻鸞其鳴矣  
懸豫章之床置長安之驛厚築牆垣思逢鄭僑之聘工  
歌周頌佇奏延陵之樂書繒有復道意無伸李那頓首

為王寬與婦義安主書

伏知道

昔魚嶺逢車芝田息駕雖見妖姪終成揮忽遂使家勝  
陽臺為歡非夢人慚蕭史相偶成仙輕扇初開欣看笑  
靨長眉始畫愁對離妝猶聞徙佩顧長廊之未盡尚分  
行憶冀迴陌之難迴廣攝金屏莫令愁擁恒開錦幔速  
望人歸鏡臺新去應餘落粉熏爐未徙定有餘烟淚滴  
芳衾錦花常濕愁隨玉軫琴鶴恒驚已覺錦水丹鱗素  
書希遠玉山青鳥仙史難通綵筆試操香牋遂滿行雲  
可託夢想還勞九重千日詎想倡家單枕一宵便如蕩



子當令照影雙來一鸞羞鏡勿使窺窓獨坐嫦娥笑人

與徐僕射領軍述役僧書

釋真觀

泉亭光顯寺釋真觀致書領軍檀越竊聞四衣開士匡  
正法於將頽十地高人秉玄文于已絕能使崛山遺跡  
無虧宴坐之風祇樹餘苗得肆經行之道伏見今者皇  
華奉宣嚴憲絳是僧尼之類不書名籍之者並令捐茲  
淨戒就此黎民去彼伽藍歸其里閭既普天之下莫非  
王臣正當僊僊恭承鞠躬祇奉但愚情所謂竊或疑焉

自佛法肇興千有餘載流傳此地數百年間濟濟僧徒  
一何為盛雖復市朝亟改風化頻移慧炬常明戒香恒  
馥其為福利難可勝言所現靈祥聞諸史傳至如浮圖  
和尚曜彩鄴中高座法師流芳翠洛或復昆明池內識  
劫燒之餘灰長沙寺裡感碎身之遺陰道開入境仙人  
之星乃出法成去世紺馬之瑞爰浮乃有青日赤髭黃  
眸白足連眉表稱大耳傳芳莫不定水淵澄義峰山豎  
汪汪道望類迦葉之高蹤肅肅威儀似顓臾之清行頌

年訛替乃日澆漓而正法洪基猶應未殄忽復違其本  
志奪彼前心莫不仰高殿而酸傷辭舊房而悽楚依依  
法座重反何期戀戀禪門再還無日乃非歧路而有分  
袂之悲雖異河梁遂結言離之痛若以不斷名籍為其  
深罪延茲咎累亦可哀矜夫出俗之人務應脩道許其  
方外之禮不拘域中之節或有不貫名籍無關簿領並  
皆遊方採聽隨處利安望剎為居臨中告飯或頭陀林  
下或蘭若巖阿如此之流寧容繼屬若勝業不全清禁

多毀宜應休道此事誠然而持犯難知聖凡相濫譬菴  
羅之果生熟難分雪山之藥真偽難辨忽使崑峰之上  
玉石同焚大澤之中龍蛇等斃何期惜也吁可傷哉又  
其割愛辭親披緇剪髮既無僕使永絕妻孥或老病之  
年單貧之士皆憑子弟還相養衛如其一朝而散便溘  
死溝渠遂有赴峻壑而投身縊長繩而殞命雖復汨羅  
之痛匹此猶輕荒谷之悲方斯未重且復奇才絕學並  
寄後生聽講誦經咸資晚秀所以須陀得戒猶是幼童

身子揚名差非耆老如斯之類若並翻緇恐此法門便  
無紹繼梵倫絕矣精舍空焉若八陣未休四郊多壘前  
房所寄後殿斯憑愚謂此人殆誠無用若必有拔踞投  
石之能索鐵伸鉤之力則並從軍幕久預長驅儻復尚  
服緇衣猶居寺宇則是習勇心薄樂道情深若非衛玠  
之清羸便同孟昶之浮怯既不便弓馬徒勞行陣雖復  
身披甲冑還想法衣手執干戈猶疑錫杖必當遙聞戰  
鼓色變心驚遠望軍麾魂飛氣懾將恐有阻都護之威

無益貳師之勇若謂不輸王課靡助國儲所以昔使收  
其賦歛但浮游之屬萍迸蓬飛散誕之流且貧終窶鄉  
里既無田宅京師又闕主人納屨則兩踵併穿歛襟則  
雙肘皆現觀董生之百結尚覺輕華見顏子之一簞更  
疑豐飽求朽壤以為藥寧識紫九服糞掃而為衣豈逢  
黃絹貨財之禮此則無從懷璧之愆信哉應免若令其  
在道猶可分衛自資遂使還民便是餽糧莫寄伏惟皇  
朝御歷齊聖欽明繼踵軒羲比肩炎昊握鏡之風彌遠

垂衣之化方深兼復梁棟三寶敷宏十善昔漢明靈威  
上夢金人晉武覆修纔招玉像用今方古彼有慙為或  
深經是護等仙預大王寶塔斯成類無憂國主明揚仄  
陋信巢父之清虛徵聘漁畋許嚴君之高尚愚謂絰預  
今者俛首僧尼若已離法衣無過道業或常居邸肆恒  
處田園並依民例宜從策使如其禪誦知解蔬素清虛  
或宣唱有功梵聲可錄或繕修塔廟建造經書救濟在  
心聽習為務乃至羸老之屬貧病之流幸於編戶無所

堪用並許停寺仍上僧籍必望十城之寶或出荆山百  
步之中時逢芳草於是寺斷流俗之僧衆無鋪糟之客  
六時翹請常以國界為心三業精修必用君王為本豈  
不幽明踴躍人鬼欣歡寔力護持善緣扶助然後二儀  
交泰六氣調和征馬息鞍軍旗卷旆邊荒入附無待丹  
水之師玉帛來朝還想稽山之集何期樂矣寔可欣哉  
儻復疆場不虞軍資有闕薄須費計伏聽徵求仰惟領  
軍檀越外則探贖典墳內則鉤深經論才高帷幄寄重



鹽梅必願降意芻蕘留心正法微惠研詳薄垂觀覽如  
其一毫可採深希曲為矜論無使蘭艾同鋤薰蕕俱剪  
庶得仙人苑裡更轉法輪長者園中還鋪講席則匡維  
之德比恒岱以齊高擁護之功似滄溟而共廣橫此忤  
煩彌增悚惕

與楊休之書

北齊祖鴻勳

楊生大弟我比以家貧親老時還故郡在本縣之西界  
有雕山焉其處閑遠水石清麗高巖四匝良田數頃家

先有野舍于斯而遭亂荒廢今復經始即石成基憑林  
起棟蘿生映宇泉流繞階月松風草綠庭綺合日華雲  
寔傍沼星羅簷下流烟共霄氣而舒卷園中桃李雜椿  
栢而蔥蒨時一褰裳涉澗負杖登峰心悠悠以孤上身  
飄飄而將逝杳然不復自知在天地間矣若此者久之  
乃還所住孤坐危石撫琴對水獨詠山阿舉酒望月聽  
風聲以興思聞鶴唳以動懷企莊生之道遙慕尚子之  
清曠首戴蒹蒲身衣緼襜出藝稻梁歸奉慈親緩步當

車無事為貴斯已適矣豈必撫塵哉而吾生既繫名聲  
之韁鑠就良工之剗劂振佩紫臺之上鼓袖丹墀之下  
采金匱之漏簡訪王山之遺文敞精神于丘墳盡心力  
于河漢摘藻期之聲繡發議必在芬香茲自美耳吾無  
取焉嘗試論之夫崑峰積玉光澤者前毀瑤山叢桂芳  
茂者先折是以東都有挂冕之臣南國見捐情之士斯  
豈惡梁錦好蔬布哉蓋欲保其七尺終其百年耳今弟  
官位既遠聲華已遠象由齒斃膏用明煎既覽老氏谷

神之談應體留侯止足之逸若能翻然清尚鮮佩捐簪  
則我于茲山莊可辨一得把臂入林挂巾垂枝携酒登  
獻舒席平山道素志論舊款訪丹法語玄書斯亦樂矣  
何必富貴乎去矣楊子途垂趣別緬尋此旨杳若天漢  
已矣哉書不盡意

為上黃侯世子與婦書

北周庾信

昔仙人導引尚刻三秋神女將梳猶期九日未有龍飛  
劍匣鶴別琴臺莫不銜怨而心悲聞猿而下淚人非新

市何處尋家別異邯鄲那應知路想鏡中看影當不舍  
啼欄外將花居然俱笑分杯帳裡却扇牀前故是不思  
何時能憶當學海神逐潮風而來往勿如織女待填河  
而相見

寄梁處士周宏讓書

王袁

嗣宗窮途楊朱岐路征蓬長逝流水不歸舒慘殊方炎  
涼異節木皮春厚桂樹冬榮想攝衛惟宜動靜多豫賢  
兄入關敬承款曲猶依杜陵之水尚保池陽之田鑿跡

幽蹊銷聲窮谷何其愉樂幸甚幸甚弟昔因多疾亟  
覽九仙之方晚涉世途常懷五嶽之舉同夫闕令物色  
異人譬彼客卿服膺高士上經說道屢聽玄牝之談中  
藥養神每稟丹砂之說頃年事邁盡容髮衰謝芸其黃  
矣零落無時還念生涯繁憂總集視陰愒日猶趙孟之  
徂年負杖行吟同劉琨之積慘河陽北臨空思鞏縣霸  
陵南望還見長安所冀書生之魂來依舊壤射聲之鬼  
無恨他鄉白雲在天長離別矣會見之期邈無日矣援

筆攬紙龍鐘橫集

貽仙城慧命禪師書

戴逵

菩薩戒弟子戴逵貽書仙城命師座下竊以渭清涇濁  
共混朝宗之源松長箭短同秉堅貞之質幸預含靈五  
常理宜範圍三教是以闕里儒童闡禮經于洙泗苦懸  
迦葉遷妙道于流沙雖牢籠二儀蓋限茲一世豈如興  
正法于鹿苑蕩妄想于鷲山半滿既陳權寔斯顯誠教  
有淺深人無內外禪師德聲遠震行高物表攝受四依

因牧羊而成誦負笈千里歷龍宮而包括故能內貫九  
部總雪山之秘藏外該七畧脩壁水之典墳支遁天台  
之銘竺真羅浮之記曇賦七嶺汰詠三河寶師妙析莊  
生璩公著論爰集若吞雲夢如指諸掌加以妙持淨戒  
如獲明珠善執律儀譬臨懸鏡稟羅雲之密行踵賓頭  
之福田撫挹定水便登覺觀高蔭禪枝將逾喜捨是以  
不遠瀟湘來儀沔陸植枝龍泉仍為精舍迴車馬谷即  
創伽藍鑿嶺安龕詎假聚沙成塔因山構苑無勞布金



買地開士雲會袂似華陰法侶豚衡衆齊禪下禪室晨  
興時芳杜若支提暮啓暫入桃源香山梵響將阮嘯而  
相發日殿妙音與孫琴而齊韻紫蓋貞松仍麾下辨洪  
崖神井即瑩高心故以才堪買山德望同輦崇峯景行  
牆仞懸絕弟子業風鼓慮欲海沉形泊渚宮淪覆將歷  
二紀晝倦坐馳夜悲愕夢未能忘懷彼我歸軫一乘遣  
蕩胸襟朗開三達既念鼠藤彌傷鳥繫昔在志學家傳  
賜書五禮優柔三元饜飫頗絕韋編搆述餘緒爰登弱

冠裾摭百家及乎從仕留連文翰雖未能探龍門而梯  
會稽賦鷦鷯而詠鸚鵡若求其一介亦髣髴古人但深  
悟聚泡情悲交臂常欲蟬蛻俗鮮貪味真如一日鄖城  
訊脩隄館屈膝情欣繫轡遇同進履未盡開襟遽嗟飄  
忽尋望拂衣世網脫屣牽絲滄浪濯纓漢陰抱甕行餐  
九轉用遣幽憂漸悟三空將登苦忍仙梁觀玉不廢從  
師深澗析桃無妨請益所希彌天勝氣乍酬鑿齒雁門  
高論時答嘉賓久暖如春願珍清軌室邇人遐彌軫襟

帶餘辭殘簡望回金玉

按書有云諸官淪廢將歷二紀則達本梁元帝時人  
梁士歸周又云及乎從仕留連文翰則亦仕梁周間

酬戴先生書

釋慧命

幽林沙門釋慧命酬書濟北戴先生夫一真常湛竅妙  
於是同玄萬聖乘機違順以之殊迹是以西關明道東  
野談仁雕朴改工有無異軫今若括此二門原茲兩教  
豈不歸宗三轉會入五乘藉淺之深資權顯寔斯若池  
分四水始則殊名海控八河終無別味檀越幼挺奇才

夙懷茂緒華辭卓世雅致參玄智涉五明學兼三教益  
矣能急蹈顏生之逸軌損之為道慕李氏之元蹤雖復  
六經該廣百家繁富聖賢異派儒墨分流或事曠而文  
殷或言高而旨遠莫不納如瓶受說以河傾明鏡匪疲  
洪鍾任扣子建挹以奇文長卿慙其高趣故雖秦楚分  
墟周梁改俗白眉青蓋龜玉之價弗踰棲鳳卧龍魚水  
之交莫異加以識鑒苦空志排塵俗形雖廊廟器乃江  
湖是以屬歎牽絲興言世網辭同應陸調合張巖嗟朱

火之遽傳慙清波之速逝方應濯足從道洗耳辭榮九  
轉充虛四禪排疾然後尋八正以味一真解十纏而遣  
三患斯之德也寧不至哉貧道識鏡難清心塵易擁定  
慙華水戒非草繫才侔撒燭學謝傳燈內有愧于德充  
外無裨于人世是以淹滯一丘寓形蓬柳端居千仞託  
志筠松測四亭于風霜候三旬于眺魄至乃夜聞山鳥  
仍代九成晝視遊魚聊追二子葦戶弊衿既在原非病  
朱門結駟亦于我如雲所嘆藤鼠易侵樹援難靜夢想

驚頭倦思難足至於林凋秋葉曾無獨覺之明谷響春  
鶯終切寡聞之歎忽承來問曲見光譽幽氣若蘭清音  
如玉誠覆溢目致歡而寔撫膺多愧雖識謝天池未辨  
北溟之說而事同泥井慙聞東海之談所冀伊人於焉  
加我黃石匪遙結期明旦白駒可繫用永終朝善敬清  
猷時因素札言不洗意報此何伸

隋煬帝召徐則下書

夫道得衆妙法體自然包涵二儀混成萬物人能弘道

道不虛行先生履德養空宗玄齊物深曉義理頗味法  
門忱性冲和恬神虛白餐松餌朮棲息烟霞望赤城而  
待風雲遊玉堂而駕龍鳳雖復藏名台嶽猶且騰寶江  
淮藉甚嘉猷有勞寤寐欽承素道久積虛襟側席幽人  
夢想巖穴霜色已冷海氣將寒偃息茂林道體休愈昔  
高山四皓輕舉漢遶淮南八公來儀藩邸古今雖異山  
谷不殊市朝之隱前賢已說導凡述聖非先生而誰故  
遣使人往彼延請想無勞束帛賁然來思不待蒲輪去

彼空谷希能屈已佇望披雲

煬帝送葬徐則下書

天台真隱東海徐先生虛確居宗冲玄成德齊物處外  
檢行安身草褐蒲衣餐松餌朮棲隱靈嶽五十餘年卓  
矣仙才飄然勝氣千尋萬頃莫測其涯寡人欽承道風  
久餐德素頻遣使乎遠此延屈冀得虔受上法式建良  
緣至止甫爾未淹旬日厭塵羽化反真靈府身體柔軟  
顏色不變經方所謂屍解地仙者哉誠得師禮未申而



心許有在雖忘怛化猶愴于懷喪事所資隨湏供給霓裳羽蓋既且騰雲空桴餘衣詎藉墳壠但杖舄猶存示同俗法宜遣使人送還天台定葬

煬帝遺史祥書

將軍總戎塞表沙漠清塵秣馬休兵猶事較獵足使李廣慙勇魏尚媿能冠彼二賢獨在吾子昔余監舉推轂治兵振皇靈于塞外驅勁旅乎大漠于時同行軍旅契濶戎旃望龍城而衝冠盼異域而發憤將軍英圖不世

猛氣無前但物不遂心僊勉從事每一思此我勞如何  
將軍夙心素志早同膠漆久而敬之方成魚水近者陪  
隨鸞駕言旋上京本即述職南蕃宣條下國不悟皇鑒  
曲發脩位少陽戰戰兢兢如臨冰谷至如建節邊境征  
伐四方褰帷作牧綏撫百姓上稟成規下盡臣節是所  
願也是所甘心仰慕前修庶得自效謬其入守神器元  
良萬國身輕負重何以克堪所望故人匡其不逮比監  
國多暇養疾閒宮厭北閣之端居罷南皮之馳射博望

之苑既乏名賢飛蓋之園理乖終宴親朋遠矣  
琴書寂然想望吾賢疾如疾首

答太子廣書

隋史祥

行人戾止奉所賜况恩紀綢繆形於文墨不悟飛雪增  
冰之地忽載三陽毳帳韋韞之鄉俄聞九奏精駭思越  
莫知啓處祥少不學軍旅長遇昇平幸以先人緒餘脩  
職宿衛懼驚蹇無致遠之用朽薄非折衝之材豈欲追  
蹤古人語其優劣曩者王師薄伐天人受脤絕漠揚旌

威震海外當此之時猛將如雲謀夫如雨至如祥者列  
於卒伍預聞指蹤之規得免逗遛之責循涯揣分寔為  
幸甚爰以情喻雷陳事方劉葛信聖人之屈已非庸人  
之敢議何則川澤之大汙潦攸歸松栢之高薦蘿斯託  
微心眷眷孟侯所知也仰惟體元良之德煥重離之暉  
正善克修萬邦以正斯固道高周誦契叶商皓豈在管  
蠡所能窺測伏承監國多暇養德怡神咀嚼六經逍遙  
百代追西園之愛客眷南皮之出遊疇昔之恩無忘造

次祥自忝式遏載罹寒暑身在邊隅情馳魏闕每至清  
風夕起朗月孤照想鳴笳之啓路思託乘于後車塞表  
京華山川悠遠瞻望浮雲伏增潛結

招道士徐鴻客書

李密

齊州長史至得所上竒策一篇理智優長文采密麗覽  
而味之嘉玩無已夫天地閉賢人隱少微光處士見是  
以崆峒之上軒轅問于廣成汾水之陽唐帝從于齧缺  
是知肥遯為美齊物攸歸雅節與蘭桂俱芳高風共雲

霞競遠孤門承世胄地藉餘緒平生大志豈圖富貴只  
為時逢板蕩代屬艱虞厭海水之羣飛憫蒼生之塗炭  
便與二三人傑百萬武旅欲受降于輒道將問罪于商  
郊未遇玄女思逢黃石詎有啓沃謀猷弼成韜鈴者也  
仙師學究本原術苞竒政八風五星之候玉臺金匱之  
書莫不洞曉于心若指諸掌今龍戰于野鶴翔寥廓或  
出或處且變且更濡足援手是曰仁人除暴靜亂方稱  
君子贊我興運今也其時師宜躡屩擔簦用虞卿之禮

披榛輓輅襲婁敬之風引領瞻望拂席相待遲聽鄙生  
之談方聞左車之說桂樹山幽歲云暮矣桃花源穴想  
見其人冬首薄寒比如宜也想攝養有方當無勞慮庶  
不遠千里早赴六軍孤已勒彼州令以禮相送冀面非  
遙遣此不多及


唐高祖報李密書

頃者崑山火烈海水羣飛赤縣丘虛黔黎塗炭布衣戎  
卒鋤耨棘矜爭霸圖王狐鳴蜂起翼翼京洛強弩圍城

無隰周原僵屍滿路主上南巡泛膠舟而忘返匈奴北  
幟將被髮于伊川輦上無虞羣下結舌大盜移國莫之  
敢指忽焉至此自貽伊戚七百之基窮于二世周齊以  
往書契以還邦國淪胥未有如斯之酷者也天生蒸民  
必有司牧當今為牧非子而誰老夫年餘知命願不及  
此欣戴大弟攀鱗附翼如惟冀早應圖錄以寧兆庶宗  
盟之長屬籍見容復封于唐斯榮足矣殪商幸于牧野  
所不忍言執子嬰于咸陽非敢聞命汾晉左右尚須安



輯盟津之會未暇卜期今日鑒輿南幸恐同永嘉之勢  
顧此中原鞠為茂草興言感歎寔疚于懷脫知動靜數  
遲貽報未面靈襟用增勞軫名利之地鋒鏑縱橫深慎  
垂堂勉滋鴻業



文章辨體彙選卷二百五十五

欽定四庫全書

集部

文章辨體彙選卷二百五十六至九

詳校官中書臣寶汝翼

主事銜臣徐以坤覆勘

總校官檢討臣何思鈞

校對官中書臣吳垣

膳錄監生臣陸鼎

欽定四庫全書

文章辨體彙選卷二百五十六

明 賀復徵 編

書五十二

睦州寄晏尚書

宋 范仲淹

伏自春初至項城因使人回草草上謝由潁淮而下越  
茲重江四月幾望至于桐廬回首大毫忽數千里日思  
奏記曼于無階恭惟蕃宣之居鈞體惟寧赫赫之瞻日

以增重某罪有餘責尚叨一麾敢不盡心以求疾苦二浙之俗躁而無剛豪者如虎示之以文弱者如鼠存之以仁吞奪之害稍稍而息迺延見諸生以博以約非某所能蓋師門之禮訓也又郡之山川接于新定誰謂幽遐滿目奇勝衢歙二水合于城隅一濁一清如濟如河百里而東遂為浙江漁釣相望鳬鶩交下有嚴子陵之釣石方干之隱茅又群峯四來翠盈軒牕東北曰烏龍崔嵬如岱西南曰馬目秀狀如嵩白雲徘徊終日不去

巖泉一支潺湲齊中春之晝秋之夕既清且幽大得隱  
者之樂惟恐逢恩一日移去且有章阮二從事俱富文  
能琴夙宵為會迭唱交和忘其形體鄭聲之娛斯寔未  
暇徃徃林僧野客惠然投詩其為郡之樂有如此者於  
君親之恩知己之賜宜何報焉今有郡齋歌詩一軸拜  
獻庶明前言之不誣爾干瀆台嚴伏增戰懼尚遠門下  
伏惟尊崇為國自重

答王觀察書

張詠

少年無思算好陪狂徒高談極飲致踰壯歲方遂策名  
洎于登朝又倖邊郡塞外清帖公中事稀日與虎侯雜  
戲為樂五木未止六博已作投壺奕棋排象旋子斯寔  
眇末無足快心其所至者蹴鞠引彊較射箒帖攘袂掣  
肘嗥呼爭贏有以壯臨軍之容資佳會之具其或八月  
草枯士皆縱獵寒風吹面則皴裂皮膚驚塵隨人則緇  
黑衣屨渴飲已冰之酒飢食連血之肉馬不絕馳弓不  
下臂知得俊為快不知勞筋為苦也又若天清氣和列

坐暢飲樂奏繁劇貔貅引前盤槩擊劍以電轉奔騎  
角觥以虎爭餘興未窮則巨觥相罰非倒甕非頽冠略  
未云止與希生者道真堪喪魂時弟年方盛氣尚壯酒  
量過常遂成飲癖洩入膜內栖于鬲中良醫不逢積痼  
成疾陰濁之氣久而下垂既漸逼于膀胱寔難歸于胃  
腑下洩無路上蒸為瘡如斯之深又將一紀與膏肓以  
同道亦腐脇之異名縱得神醫亦難措手誠由性愚不  
知攝養貪酒不知搏節之所致也非身災命滯之有云

有則暫食瘡痛飲水血流到闕二旬未能入見上負明  
君捨爵之恩下累平生行心之願由此而較乃是罪人  
數年前兄為中執中執者諸侯跋扈宰相弄權授受匪  
人風教頗僻法度踰紊私謁公行繩違整綱真執憲之  
用也俾天子之道廓如坦途詞濫之蹤泯然亡絕豈異  
乎獬豸有睨太阿欲揮持正之風凜然可懼故公卿庶  
正不可得而洽也兄懇苦相念畧無避嫌親染簡題手  
封靈藥遠在千里致于下交必欲祛弟羸疴使之丁壯



起弟驅走使之報君有以見君子之用心憂于人急于義不與古賢並者誰可方爰屬阻修尋闕報復諒不以為慢而信為感之深兄臨民有仁馭遠有術苦寒在候善飯是宜無任祝頌瞻望之至

寄舒子

明王廷陳

辱書教以矜飾名行意甚勤懇僕惟少負性氣自視無前遭事直往不知其可復見近世州郡之吏務為諂承故于逢迎節數稍為損減不意遂犯當世之怒又以一

二宰執舊怨于僕內外搆扇中僕惟恐不深耳曩時交遊見僕狼忤要津虞禍及已莫敢張口伸舌一為論列明其不然者當是時也吏無振滯之議友無急難之仁幽于圜牆之中日與徒隸為伍身非木石其何以堪以故俛首震惕卒從文比嗟乎百犬吠聲積羽折輪十夫桡推三人成虎此墨翟有素絲之悲阮籍有窮途之哭也身媿娥眉敢云見妬行垂完壁而欲免于瑕摘也難矣然猶苟全要領生還鄉縣奉二親之晨昏上先世之

丘墓撫今悼往憂喜駢集因念河清難俟人事靡常南山之歌恨長夜之莫旦竹林之侶假麴蘖以紓悰斯達士所以放言幽人因之長往者也自分身累百詬長為世棄乃稍稍脫拘攣之文逸瑣尾之忌弛煩多之勢然亦不敢踰大閑冒隱惡滅先王之禮觸當世之禁務敦窮居之尚絕希進之心而執事乃欲責煖于寒灰俟完于墮甑幾翔于鍛羽望僕以回景曜之末照而收桑榆之晚績也無乃與僕之私指謬乎夫秦鹿頻纓志在豐

草羈鳥奮翮棲慕一枝即有惡殺之國過仁之主腴飼之廝寵之以高軒享之以玉饌娛之以雕檻啗之以棗脯彼且駭顧驚鳴奔逸之惟遠耳僕聞古之聖賢心有所鬱結不能通其意則著一家之言思垂不朽僕誠欲效之用舒憤懣庶幾償前辱之萬一流文采于無窮然才劣左馬而欲自附于作者畫虎之誚其能免乎方將修農圃之業給公家之輸賴其羨餘以贍妻子長為太平之民雖至老死不覲兵革志願畢矣

上翟中丞

王廷陳

青石先生門下執事以名世之才發跡於齊魯之墟揚  
聲於金馬之遶掇精於墳索之域投足於賈馬之室僕  
亦幸綴同朝寺尾鷄鷩之班然竟不得附交遊之末接  
殷勤之歡奉譏彈之益獨于名家卷牒獲覲篇什竟日  
手之高誦微吟恍若瑤章之在握明珠之照眼也氣奪  
心悸三歎不已又安敢繫瓦缶于黃鐘之側遭曠涓而  
為野音哉既而執事出禁闥提兵符鷹揚河洛豺狼滅

影頻使戈鋌化為農器文事武備古罕儕倫僕時亦以口語橫遭譴逐待罪裕州無叔夜之賢而負不堪之禍以致拜揖違宜逢迎失措暴擊之隼乘其摧頽青蠅之人共加搆會身淹梁獄履影弔心不能上書以自明叩心以致感而文法之吏背棄繩墨無折中處平之心而有重羅深錮之慘曩時道義之交一旦革素改性畏與罪人比暱乃獨執事不奪多口垂光扁禁勉以加餐再為授簡失路之人恩成不報是後垂翅故棲不務矜節

高乏丘園之賁里無簾肆之奇在泥淖而媿魚龍之德  
處山澤而寡珠玉之光乃徒伏跡于蓬蒿之下甘心于  
鹿豕之羣每謂龐德公隱于鹿門率妻子以躬耕漢陰  
丈人抱甕灌園滄浪漁父鼓枻行歌皆楚之逸人也心  
竊慕之學而未能志惟切于苟全自謂可以無咎豈知  
羗夷起于門牆而猛獸之爪牙乃在手足也向非執事  
至公至仁深知其不然力為之引手其不墜萬仞之淵  
飫羣虎之腹哉夫曾參殺人言之者三母為投杼羊叔

子之不醜人也其敵而信之夫祐之賢不及參抗之親孰如母然此信而彼疑者何也故心跡見諒異域即親擬議之明同枝何益昔人有謂日受千金之賜而不可以為知己者傳曰人之相知貴相知心又曰士為知己者死使知己而可多得也何用死之故蘇秦不信于秦而尾生于燕豫讓衆人于中行氏而國士于智伯彼之心以地移行因主異者何哉誠以知遇之難逢思欲一效其忠誠委軀命而不惜也執事乘節鉞之權總連帥



之職深仁淺乎湘流巍名俯乎衡嶽方將建不朽之業  
流金石之聲豈徒稱雄于翰墨爭長于詞賦哉僕當以  
其微能述父老之言采聞見之寔予以顯序功德彰示  
方來也且翳桑之餓人猶能策名于後世僕雖德輕鴻  
毛賤同土壤猶庶幾與此類比乎肝肺之言敢因執事  
者布之

與金鶴卿書

楊慎

自七月之變分手非所不面之濶藐焉五年斷金睽于

參商渴瓊發于寢寐如何其可聊也惟別之後兩枉珍翰一投嘉藻啓緘伸紙喜與忤會既覩手跡兼照心素滯荆之跡雖同仲宣投沙之懷曼異賈傳欣恟欣恟幸甚幸甚亟欲嗣音仍闕便驛遷延至今傾翹益勤走傷弱之軀不耐瘴厲戊子春月忽中末疾篤瘥沉痾行動仰人窮荒絕域乏醫鮮藥閉門抱影越歲踰時近兵烽甫定而札瘥大侵繼之蓬心搖兀難以托根波臣涸轍又復轉徙孤懸浮寄望鄉益遠無悰寡侶較傾彌甚僭

石同栗里而室無阿舒之愉遲暮如子雲而門無好字  
之間僻遠視瓊儋而館無白鶴之假寂寞均柳永而遊  
無黃溪之適時復靜言追惟疇曩承清塵于俊邁廁華  
景于英流桑梓芝蘭之契宴笑過從之雅微言疑義之  
析酒賦歌僮之懽炳焉服膺宛猶昨暮忽爾影響曠若  
隔世存者如辰星之望逝者有宿草之悲老子芻狗之  
談釋氏露電之喻其最得乎獨居多暇感集悲來輒藉  
此言詮以濯情累高朗之懷其有同哉離索以來久廢

觚翰漫爾有作不能多所錄于別帙者是茲用附之去  
牘庶傳千里之志可代一夕之話款襟其遠覩縷莫罄  
時有南風更冀良訊不宣

文章辨體彙選卷二百五十六

欽定四庫全書

文章辨體彙選卷二百五十七

明 賀復徵 編

書五十三

以下律體

答刺史杜松之書 唐王勣

日月博士陳龕至奉處分借家禮并帙封送至請領也  
又承欲相招講禮聞命驚笑不能已已豈明公前眷或  
徒與下走相知不熟也下走意疎體放抑有由焉兼棄

俗遺名為日久矣淵明對酒非復禮義能拘叔夜携琴  
唯以烟霞自適登山臨水邈矣忘歸談虛語玄忽焉終  
夜僻居南渚嘗來北山兄弟以俗外相期鄉閭以狂生  
見待歌去來之作不覺情親詠招隱之詩惟憂句盡惟  
天席地友月交風新年則柏葉為尊仲秋則菊花盈把  
羅含宅內自有幽蘭數叢孫楚庭前空對長松一樹高  
吟朗嘯挈榼提壺直與同志者為羣不知老之將至欲  
令復整簪履修束精神揖讓邦君之門低昂刺史之

坐遠談糟粕近棄醇醪必不能矣亦將恐蜀狗貽夢社  
櫟見嘲去矣君侯無落吾事

與陳叔達重借隋紀書

王勣

父承所撰隋紀繕寫咸畢前舍弟及家人往並有書借  
咸不見付豈連城之珍侯楚文而乃進崩山之操待鍾  
期而後發應以左貂右蟬榮冠東省掌壺負璽望重南  
宮朝夕丹墀揖讓增價往來青瑣步頓生光豐屋華棖  
顧蓬蒿而徙眷鳴鐘列鼎想藜藿而移交不與驕期遂

忘曩時之好耳僕遭逢明聖棲遲丘壑幸悅堯舜之風  
得全箕穎之操雖心期所託吾道遙存而出處離異儀  
形難接所以願憑鱗羽宛若承願望觀述作欣然得意  
足下裁成國典褒貶人倫之使明鏡一時覆車千祀故  
當貽諸好事豈擬唯傳子孫方復固其緘滕嚴其扃鐫  
天下之望豈如是乎僕亡兄芮城嘗典著局大業之末  
欲撰隋書俄逢喪亂未及終畢僕竊不自揆思卒餘功  
收撮漂零尚存數帙兆自開皇之始迄于大業之初咸



亡兄黜竄之遺跡也大業之後言事闕然僕雖欲繼成  
無可憑採以此尤思見足下之所作也還使請致無再  
三王勣白

答王勣書

杜之松

辱書知不降顧嘆恨何已僕幸恃故情庶迴高躅豈意  
康成道重不許太守稱官老萊家居羞與諸侯為友延  
佇不獲如何如何奇跡獨全幸甚幸甚敬想結廬人境  
植杖山阿林壑地之所豐烟霞性之所適蔭丹桂藉白

茅濁酒一杯清琴數弄誠足樂也此真高士何謂狂生  
僕憑藉國恩濫尸貴部官守有限就學無因延頸下風  
我勞何極前因行縣寔欲祇尋誠恐燉煌孝廉守琴書  
而不出酒泉太守列鐘鼓而空還所以遲迴遂攬轡也  
僕雖不敏頗識前言道既知尊榮何足恃豈不能正平  
公之坐敬養玄唐屈文侯之膝恭師子夏雖齊桓德薄  
五行無疑睢夸故人一來何損蒙借家禮今見披尋微  
而精簡而脩誠經傳之典畧閭庭之要訓也其喪禮新

義頗有所疑謹用條問具如別帖想荒宴之餘為銓釋也遲交知問杜之松白

為人與蜀城父老書

王勃

蓋聞天地作極不能遷否泰之期川岳薦靈不能改窮通之數豈非賢聖同業存乎我者所謂才榮辱異流牽乎彼者所謂命是以龍驤鳳翥伊周成翊贊之功含糗羹藜顏冉困栖遲之病或先號而後笑或始吉而終凶事不可量功未必定則知洪濤未接長鯨多陸死之憂

層風未翔大鵬有雲傾之勢池鰭井鮒亦將鼓鱗而輕  
之田鳩埜鸚亦將騫翮而舞之及其衝溟渤接扶搖吹  
波則江海倒騰氣則虹蜺掩摩赤岸負蒼天然後知其  
力馬吁韓信之無津也昌亭之一餓夫耳馬卿之失路  
也臨卽之一食客耳武不足以服衆文不足以動時長  
劍屈于無知洪筆淪于不用洎乎雄圖躡運至尊納背  
水之謀麗藻昇朝天子賞凌雲之作威加海岳聲振廊  
廟彼淮陰之俠少成都之遺老也又馬能知遠近哉是

以鑒物于肇不于成賞士於窮不於達是知卞和之得  
玉也精存于岸谷之間張華之得劍也氣發于星辰之  
際夫豈琢磨成器然後知其寶剗斷為能然後知其用  
哉仰惟鄉耆等並玉山高族金堤勝侶列子弟于干城  
耀衣冠于百代或以風雲去國公孫躍馬之年鍾鼎從  
王諸葛攀龍之日門庭相接雕甍將綺棟連陳機杼相  
和鳳攝將虬梭交響金漿玉饌食客三千綠幘青裳家  
僮數百冲襟眇識人多江漢之靈麗藻華文代有雲泉

之氣北齊開敞南館虛閒詩酒同歸琴書合契忘機得意耻嵇阮之交疎虛席延賓恨原嘗之客少寔烟霞之藪澤風月之津梁乎劉仲文之遠識不以乾沒詣梁城閔仲叔之高風不以口腹累安邑雖其已沒生氣猶存况乎屬宇宙之明當天下之泰不能俯拾青紫高視縉紳攀北極而謁帝王入南宮而取卿相脅肩側足求哀鍾釜之間低首俛眉取濟斗升之末嗟乎誠下官所以仰天漢而鬱怫臨江山而慷慨者也但時可以未遇道

可以未行志願可以未成功業可以未就古之才足以  
輔王業躡跡屠釣之間功可以濟巨川藏身版築之下  
百里奚之負販陳湯之丐貸而況于庸者哉此僕所以  
駿奔于顧眄之餘自致于恩光之末也且夫精誠所感  
尚動神明意氣相交豈慙車馬儻能投心季子遙存素  
紵之恩援手應侯先立綈袍之贈豈人之情也能無報  
乎方今白藏紹序朱律謝期天高而林壑踈候肅而江  
山靜輕蟬送夏驚晚吹于風園旅雁乘秋動宵吟于露

渚絲纈戍于南畝杭黍被于東阡時計有儲願履多福  
下官薄遊縣載飄寓淹昔歡躋相仍憂虞自積陟梁鴻  
之峻岳何暇長謠臨阮籍之長途唯知慟哭庶憑賙給  
以濟漂危輕訴短懷佇流嘉耗

再與蜀城父老書

王勃

蜀都廣鎮岷壚興壤山分玉宇水向金陵景貺有期英  
靈間出榮問休暢幸甚幸甚夫神有可通淥波驚七柱  
之音道有可符玄霜扣九鐘之節豈道窮精秘妙聽察



於無聲理寔杳冥玄應通于不測波流柱響波無入柱  
之因霜落鐘鳴霜非扣鐘之具矣况乎言忘意得臭味  
相求目擊道存神明已接鄭僑之逢吳札無謂殊方阮  
籍之對嵇康自然同氣僕雖不敏嘗從事于斯矣嘗謂  
薰蕕不共器梟鷙不比翼是以類乎方者按風雲於千  
里垂乎類者起山川于一面抑嘗聞之士之生也其跡  
可擯而道不可藏其身可辱而志不可奪其有拂衣投  
臂遁形滄海之隅裂裳裹足獨立高山之頂量腹而食

度身而衣以鐘鼎為芻豢以衣冠為縲紲方欲策鸞鳳而撫雲英鞭虹霓而採烟液其次排玉闕指金門成賈誼之謨樹終軍之策因機入務懷素將相之門沐露沾霜擁篲公侯之室然則拾青紫于旦暮取功名於俄頃演文物而動寰中騰聲名而振天下若下官者可謂慚二途矣而斂手長揖強顏高視低心于蹇躓之辰忍耻于恓惶之日者哉渭濱留釣鷹揚之業未萌緇源滯牧鴻漸之資益寡及其攀窮運接靈期乘雷雲而清八極

和陰陽而調萬品則知冥機所運吉凶在倏忽之間玄  
命所移飛伏于斯湏之際以日月自至聊復爾爾方今  
炎飈謝節爽候闕辰風高而宇宙清霜下而亭郊肅歸  
雲止雁流曙響于東津落照開鴻寫清規于北岸螢疎  
夕砌蟬促朝林感序緣情臨風寄賞僕一違秦隴再單  
炎涼戒征軸而無因指歸途而有倦故鄉超曠曾山重  
復吳宮尚遠頻驚去燕之心楚峽猶賒已下聞猿之淚  
徒以風猷未隔道義相存幸承知己之心稍緩他鄉之

思昔者虞公再見懸光白璧之前季布一言猶定黃金之諾況乎交已成于杵臼道已茂于金蘭希照窮途遠流嘉貺若使恩裁口腹空留安邑之賓惠闕始終取恨昌亭之客

上吏部裴侍郎書

駱賓王

武功縣主簿駱賓王謹再拜書上裴公執事易曰書不盡言言不盡意然則理存乎象非書無以達其微詞隱乎情非言無以筌其旨僕誠鄙人也頗覽前事每讀古

書高堂九仞曾參負北向之悲積粟萬鍾季路起南遊  
之嘆未嘗不廢書輟卷流涕沾襟何者情蓄于中事符  
則感形潛于內迹應斯通是布腹心罄瀝肝膽庶大雅  
含弘之量矜小人惻款之誠唯君侯察焉某一藝罕稱  
十年不調進寡金張之援退無毛薛之遊亦何嘗獻策  
干時高談王伯銜材揚已歷詆公卿不汲汲于榮名不  
戚戚于卑位蓋養親之故也豈謀身之道哉不圖君侯  
忽垂過聽之恩任以書記之事儼人則多慙阮瑀入幕

則高謝郝超昔聶政荆軻刺客之流也田光豫讓烈士之分也咸以勢利相傾意氣相許尚且捐軀燕趙甘死齊韓今君侯無求于下官見接以國士正當陪麾後殿奉節前驅賈余勇以求榮效輕生而答施而顧逡巡于成命躊躇于從事者徒以夙遭不造幼丁閔凶老母在堂常嬰羸恙藜藿無甘旨之膳松楸闕遷厝之資撫躬有無何心天地故寢食夢想噬指之戀徒深歲時烝嘗崩心之痛罔極若僕者固名教中一罪人耳何面目以

奉三軍之事乎況屬天倫之喪奄踰七月違膝下之養  
忽已三年而凶服之制行終哀疚之情未洩興言永慕  
舉目增傷夫怨于心者衷誠可以應木石感于情者至  
性可以通神明故徐元直指心以求辭王令伯陳情以  
窮訴上以棄興王之佐命下以全奉親之篤誠而蜀主  
不以為非晉君待之愈厚此二者豈貪貧賤惡榮華厭  
萬乘之交甘匹夫之辱也盖有不得已者哉人有乾沒  
為心脂韋成性捨慈親之色養許明主以驅馳內忘顧

復之私外存傳會之眷薄骨肉厚榮寵苟背恩而自效  
則君侯何以處之且義士期乎貞夫忠臣出乎孝子既  
不能推心以奉母亦安能死節以事人假物議之無嫌  
實吾斯之未信也况流沙一去絕塞千里子迷入塞之  
魂母切倚廬之望就令歡以卒歲仰南薰之不貲而使  
憂能傷人逼西山而何幾君侯情深錫類道叶天經明  
恕待人慈心應物儻矜犬馬之微願憫燕雀之私情寬  
其負恩遂其終養則窮魂有望老母知歸再拜



與博昌父老書

駱賓王

雲雨俄別封壤異鄉春渚青山載勞延想秋天白露幾  
變光陰古人云別易會難不其然也自解携襟袖一十  
五年交臂存仁畧無半在張學士溘從朝露辟閭公倏  
掩夜臺故吏門人多遊蒿里耆年宿德但見松丘嗚呼  
泉壤殊途幽明永隔人理危促天道奚言感今懷舊不  
覺涕之無從也過隙不留藏丹難固追惟逝者浮生幾  
何哀緣物興事因情感雖蒙莊一指殆先覺于勞生秦

俠三號詎忘情于怛化啜其泣矣尚何云哉又聞移縣  
就樂安故城解宇邑居咸徙其地里閑阡陌徒有其名  
荒徑三秋蔓草滋于舊館頽墉四望拱木多于故人嗟  
乎仙鶴來歸遼東之城郭猶是靈烏代謝漢南之陵谷  
已非昔吾先君出宰斯邑清芬雖遠遺愛猶存延首城  
池何心天地雖則山河四望足稱無棣之墟松檟千秋  
有切惟桑之里故每懷宿昔尚想經過于役不遑願言  
徒擁今西成有歲東戶無為野老清談怡然自得田家

濁酒樂以忘憂故可洽賞當年相歡卒歲寧復惠存舊  
好追思昔遊所恨企予望之經途密邇佇中衢而空軫  
巾下澤而莫因風月虛心形留神送山川在目室邇人  
遐以此懷勞增其嘆息情不遺舊書何盡意

答員半千書

駱賓王

張評事至辱惠書及詩把翫無厭覽如有叙上言離恨  
下勗交情篤以猛風乾蘓之說彌以驟雨濕薪之喻雖  
聞義則徙道存于起予而擬人失倫事均乎翫物借如

誠說蓋足下之不知言倘或劇談豈吾人之所仰望夫  
鯤之為魚也潛碧海泳滄流沈腮于渤海之中掉尾于  
風濤之下而濠魚井鮒自以為可得而齊焉鵬之為鳥  
也刷毛羽恣飲啄戢翼于天地之間宛頸于江海之畔  
而雙鳬乘鴈自以為可得而襲焉及其化羽垂天搏風  
九萬振鱗橫海擊水三千寧豈借翰于檣榆假力于在  
藻資江濱涓流之水待堀堞揚塵之風哉故張子房之  
達人也擊水搏風之適焉朱買臣之屈已也戢翼沈腮

之致馬足下雅得古人之致不乏先賢之遇自守莊筌  
無嬰魏網亦寧不知在藻槍榆之力非擊水搏風之助  
哉而詞旨殷勤深所未諭盍言爾志豈若是乎夫人生  
百年物理千變名利寵辱之形立矣愛憎毀譽之跡生  
焉其有道在則尊德成而上幽貞為虛白之室靜默為  
太玄之門知軒冕是倘來悟榮華非力致苟斯道之不  
墜亦何患乎無成而欲圖僥倖于權重之交養聲譽于  
衆多之口所以楊朱徘徊于岐路阮籍怵惕于窮途嗟

平霜往露來歲寒不待山高河廣離會無時桂樹寒花  
公子去而忘返松巖春草王孫遊以不歸去矣員生遠  
離隔矣音塵不嗣情其勞矣畏途窮谷靜躁殊矣惠而  
好我無密爾音

文章辨體彙選卷二百五十七

欽定四庫全書

文章辨體彙選卷二百五十八

明 賀復徵 編

書五十四

謝陳玉壘相公

明湯顯祖

閣下會昌啓運大錄凝祥虹玉早見于天而克岐克嶷  
星壘代明於地而有馮有翼殷禮配天平格有陳伊陟  
周常戴日忠貞若曰君牙帝乃睠予在西儼三垣之上

相衆所居而共北况百里之微郎擬附鳳而卷阿之車  
馬何多欲登龍而積水之風雲自少至如某者匡中朽  
埴蠡外寒流高挾天庭已識淵雲之秀低徊世路彌沾  
蜀日之華山木歌其不知澧蘭思而未敢三年待臯繭  
庭身素食之慙一念好賢王室世衮衣之敬在戔戔而  
莫展庶斷斷以如容

答錢岳陽督學

湯顯祖

門下天姥開其壇塲日鑄生其鄞鄒自領洪都之學出



乎潛而見龍爰登壁水之臺起于飛而振鷺可謂琴瑟  
絲竹登魯壁之清聲珪璧佩環下梅梁之古色邇乃星  
辰卽位參北斗喉舌之司江海池陽正南國股肱之郡  
起新知于物祖眷舊德以人師若小兒開遠方當舞象  
之年敢附雕龍之世而亦拂其總角引以譽髦雖豫章  
之生七年材不材而出地得夫子之牆數仞步亦步以  
窺天夫豈闕其無人必小子之有造若云幸哉有子慰  
愚父之亡聊心底厲以弗諼意扳援而靡及恃父子家

人之愛辱公侯國士之知三事為期萬年以祝

答張夢澤

湯顯祖

門下毓采南維宣機北極出蘭陵而結綬揚秋馥于清  
風臨渝水以鳴琴寫春融于白雪士民久希乎甘棠賓  
從鄰輝于玉燭至如不佞偏州浪士盛世遺民可為大  
夫枉登高而作賦又聞君子曾過庭而學詩子雲之心  
尚玄世皆譏其寂寞長宏之血未碧天不鑒其精誠自  
分地阻人偏殘叢二酉之蠹簡何悟天發吾覆快睹三

辰之龍旗蹙然足音燦其物色大臣之度休休若自其  
口吉人之詞藹藹如見其心既愛我甘敢自愧其雕飾  
言采其苦必無棄于葑菲謹以玉茗編紫釵記操縵以  
前餘若牡丹魂南柯夢繕寫而上問黃梁其未熟寫盧  
生於正眠蓋惟貧病交連故亦嘯歌難續空垂愛日感  
瓶冰以測寒願借長風獻指節而知短未展登龍一念  
乃煩良馬三之恭承大製久絃誦于諸衿奉揚仁風輒  
謳歌于片楮名香挹荀令之氣廉金頌陶徑之資感公

度之隆施慙寸私其匪報

答王靈宇制府

湯顯祖

珠厓可擊捐之徒以屈漢公卿銅梁既開長卿所以諭  
蜀父老人言不足中每信而見疑公度有餘外且存而  
不論固已允文允武庶幾純孝純忠至如不佞清時棄  
士僻壤餘生見武公代有司徒願附緇衣之好聞名伯  
王命乃祖喜傳圭瓚之文顧後進而當王公之前纂組  
難通于錦水匪先容而居賓客之末絲蘿乃寄于松潘

敢云續千賦之心何當動百年之感一語為知九頃鳴  
謝風雲路斷無由沾公旦一沐之榮雨露天寬庶幾賡  
古甫萬邦之頌

復門人藍翰卿

湯顯祖

不佞愚鄙歷落之士蔽石林而無觀思相藻以何言乃  
有空谷足音疑是真人天際今文古文皆有大言小言  
俱來物鉛素于九流理筌玄于二氏居然不朽而在諸  
生然且採拾虛浮過自撝挹高山有客能通咫尺之書

委土可師謬為函丈之敬初當之而汗聳既循之以心  
疑豈向若者真有懷于望洋將巡方者偶留聲于牧馬  
真龍何待假龍以生雲雨鉅蛇或負小蛇以示神奇豈  
大雅之故然乃高明之作用如不佞者懶散筆研之外  
陶寫絲竹之間獨有停雲之思不絕臨風之興以君大  
有示我同人即欲恃知己獻千一之愚為丈人起百六  
之運其如空虛無以相益尊光祇以流謙一字為榮九  
頃而謝

答余瑤圃

湯顯祖

不佞自為童子求蒙而叨執憲之知暨作祠郎進旅而  
托司空之重仁深引汲義切歸依顧以竄迹于炎方遂  
乃銷聲于寒谷音徽儼爾慶赴闕如每咏大車動羔裘  
豹袂之想欲陳采藻寫桃投李報之思力請未能公論  
具在加以通家之喜得觀華國之成妙宰殊高于一丘  
集賢將徵于四諫拜太丘于都下久知元方之有季方  
重蒼生于會稽快覩萬石之齊安石方懷宿好更重新

知海上相望明月祇用思存山中惟有白雲無堪持獻

與郎署同志書

蔡復一

漢署談兵常笑為郎之老武谿聽曲始知作吏之勞何  
者千里鴻哀則心痛如病兩衙蜂擁則體煩若醒況乎  
笛橫備弛之鄉餉竭兵驕之會信犬非舞干之能格牢  
乍補于亡羊飢兒豈折筮之可筭眠無殊于抱虎乎翻  
思曩者官枝月閨署冷雲閒得以晤語名流醉心往牒  
挂西山之笏似是馬曹賞流水之琴非無鍾子清都舊



福忽飄墮于修羅山鳥今籠猶低徊乎故岫情所至也  
豈不然哉緬惟台丈鳴珮握蘭居則勝矣高牙大纛行  
亦隨之則咏風築金之臺醉月擊筑之市異書可購勝  
友相過言開肺腑之言事舒眉目之事此官此地何日  
何年勿如弟夢裏役夫空自哂于列子車中新婦復同  
嘆于曹公也然庶驥性乖鸚鵡見隔如或君臣之志惟  
許憂先文武之才偏推憲遠則固宜攬俊豪以恢識量  
衡今古以釀經綸曼倩陸沉難預翹材之館山公水鏡

豈入步兵之厨信搏風追電之羽毛絕豐草茂林之擬  
議矣若某者短長有分流坎隨緣偶成郢客之書樂作  
楚狂之態高張遠路徒握草以徬徨班尹竟霄或開函  
之髣髴能忘將伯不盡跂予

與館中諸公書

蔡復一

某受才奇短宿有隱心入世甚疎初無多意但以識紫  
芝而不恨頗愜平生蕪之種黃菊以無資未忘吏隱擬  
薄驅轅蹇償舊債於風塵便歸狎渚鷗待新濡于霖

雨不謂官是腐物偏韵士以相仇命令勞薪偶征人而  
獨笑僅採蘭者一載旋寘棘于三苗止悍卒之脫巾矛  
頭浙水緝窮邊而固圍虎畔編籬雖量徙以稍前實投  
荒乎奚擇窮艱慚技倦鳥思林倚短笛于谿邊望仙山  
若天上伏惟雍容著作之府鼓吹休明之時翰林主人  
卿聊名于予墨太平宰相公預兆于腹松固已鳳朝陽  
以高鳴鵬俯風而在下者也豈可以襁纊之狀論于瑚  
璉之前哉若某者仕進違心退耕乏力厭茲紛牘羨昔

閒曹乃知都尉談兵何憾為郎之老茂光武庫宜嗟作  
吏之拘矣因羽便風寄情皓月禁中頗收佇觀鎮撫于  
四夷海上漁樵庶獲歸吟于一壑顧楚箝之詎免惟韓  
斗以馬依

文章辨體彙選卷二百五十八

欽定四庫全書

文章辨體彙選卷二百五十九

明 賀復徵 編

尺牘一

賀復徵曰尺牘者約情愔於尺幅之中亦簡畧之稱也劉勰所謂才冠鴻筆多踈尺牘是也

遺魯君

魯臧文仲

歛小器投諸台食獵犬組羊裘琴之合甚思之臧我羊

羊有母食我以桐魚冠纓不足帶有餘

楊云臧文仲使於齊齊人繫之

獄故其書隱語以寄魯君也魯君不知而問其母其母解之云云見列女傳

上楚王隱楚莊姬

大魚失水有龍無尾牆欲內崩而王不視

王問之對曰魚失水離國

五百里也龍無尾年三十無太子也牆崩不視禍將成而王不改也楊云案此皆叶韻視音以改亦音已劉勰云文仲謬書于羊裘楚姬托諷於龍尾指此二事也

遺大夫種

越范蠡

蜚鳥盡良弓藏狡兔死獵狗烹越王為人長頸烏喙可

與共患難不可與共安樂子何不去

辭越王

范蠡

臣聞主憂臣辱主辱臣死昔者君王辱於會稽所以不死為此事也今既雪恥臣請從會稽之誅

遺楚懷王

秦昭王

始寡人與王約為兄弟盟於黃棘太子入質至驩也太子陵殺寡人之重臣不謝而亡去寡人誠不勝怒使兵侵王之邊今聞君王乃令太子質於齊以求平寡人與

楚接境婚姻相親而今秦楚不驩則無以令諸侯寡人  
願與君王會武關面相約結盟而去寡人之願也

與楚頃襄王

昭王

楚倍秦秦且率諸侯伐楚願王之飭士卒得一樂戰

與平原君

昭王

寡人聞君之高義願與為布衣之交君幸過寡人寡人  
願與君為十日之飲

與樂毅

燕惠王



先王舉國而委將軍將軍為燕破齊報先王之讐天下莫不振動寡人豈敢一日而忘將軍之功哉會先王棄羣臣寡人新即位左右誤寡人寡人之使騎劫代將軍為將軍久暴露於外故召將軍且休計事將軍過聽以與寡人有隙遂捐燕而歸趙將軍自為計則可矣而亦何以報先王之所以遇將軍之意乎

治驪山陵上書

秦李斯

臣所將隸徒七十二萬人治驪山者已深已極鑿之不

入燒之不難叩之空空如下天狀

諫始皇書

太子扶蘇

天下初定遠方黔首未集諸生皆誦法孔子今上皆重  
法繩之臣恐天下不安唯上察之

進諫二世書

子嬰

臣聞故趙王遷殺其良臣李牧而用顏聚燕王喜陰用  
荊軻之謀而倍秦之約齊王建殺其故世忠臣而用后  
勝之議此三君者皆各以變古者失其國而殃及其身

今蒙氏秦之大臣謀士也而主欲一旦棄去之臣竊以  
為不可臣聞輕慮者不可以治國獨智者不可以存君  
誅殺忠臣而立無節行之人是內使羣臣不相信而外  
使鬪士之意離也臣竊以為不可

遺章邯

楚陳餘

白起為秦將南并鄢郢北阬馬服攻城略地不可勝計  
而卒賜死蒙恬為秦將北逐戎人開榆中地數千里竟  
斬陽周何者功多秦不能封因以法誅之今將軍為秦

將三歲矣所亡失已十萬數而諸侯並起滋益多彼趙高素諛日久今事急亦恐二世誅之故欲以法誅將軍以塞責使人更代以脫其禍將軍居外久多內隙有功亦誅亡功亦誅且天之亡秦無愚智皆知之今將軍內不能直諫外為亡國將孤立而欲常存豈不哀哉將軍何不還兵與諸侯為從南面稱孤孰與身伏斧鑕妻子為戮乎

遺項王

漢張良

漢王失職欲得關中如約即止不敢復東

報柴將軍

韓王信

陛下摧僕閭巷南面稱孤此僕之幸也滎陽之事僕不能死囚於項籍此一罪也寇攻馬邑僕不能堅守以城降之此二罪也今反為寇將兵與將軍爭一旦之命此三罪也夫種蠡無一罪身死亡僕有三罪而欲求活此伍子胥所以債於吳世也今僕亡匿山谷間旦暮乞貸蠻夷僕之思歸如痿人不忘起盲者不忘視勢不可耳

與蕭丞相書

鮑生

王暴衣露蓋數使使勞苦君者有疑君心也為王計莫若遣君子孫昆弟能勝兵者悉詣軍所上必益信君

遺諸侯王

齊哀王

惠帝崩高后用事春秋高聽諸呂擅廢高帝所立又殺三趙王滅梁燕趙以王諸呂分齊國為四后崩皇帝春秋富未能治天下固恃大臣諸將今諸呂又擅自尊官聚兵嚴威劫列侯忠臣矯制以令天下宗廟所以危今

寡人率兵入誅不當為王者

遺竇長君

季布

吾聞曹丘生非長者勿與通

問上元夫人

西王母

王九光之母敬謝但不相見四千餘年矣天事勞我致  
以愆面漢帝好道適來視之見其了了似可成進然形  
慢神穢腦血淫漏五臟不淳關胃彭孛骨無津液脈浮  
反升肉多精少瞳子不夷三尸狡亂玄白失時雖當語

之以至道殆恐非仙才也吾久在人間實為臭濁然時復可游望以寫細念庸主對坐悒悒不樂夫人可暫來否若能屈駕當停相須

與公孫弘書

東方朔

蓋聞爵祿不相責以禮同類之遊不以遠近為是故東門先生居蓬戶空穴之中而魏公子一朝以百騎造之呂望未嘗與文王同席而坐一朝讓以天下半大丈夫相知何必以撫塵而游垂髮齊年偃伏以日數哉



其二

木槿夕死朝榮士亦不長貧也

上友人書

東方朔

不可使塵網名韁拘鎖怡然長笑脫去十洲三島相期  
拾瑤草吞日月之光華共輕舉耳

遺公孫賢良

鄉長倩

夫人無幽顯道在則為尊雖生芻之賤也不能脫落君  
子故贈君生芻一束詩人所謂生芻一束其人如玉五

絲為緇倍緇為升倍升為緇倍緇為紀倍紀為緇倍緇為緇皆自少之多自微至著也士之立功勲効名節亦復如之勿以小善不足脩而不為也故贈君素絲一緇撲滿者以土為器以蓄賤具其有入竅而無出竅滿則撲之土麤物也錢重貨也入而不出積而不散故撲之士有聚歛而不能散者將有撲滿之敗可不誠歟故贈君撲滿一枚猗嗟盛歟山川阻脩加以風露次卿足下勉作功名竊在下風以俟嘉譽

答牂牁盛覽

司馬相如

詞賦者合綦組以成文列錦繡而為質一經一緯一宮一商此賦之迹也賦家之心包括宇宙總覽人物斯乃得之于內不可得而傳

上出財佐軍書

卜式

臣聞主媿臣死羣臣宜盡死節其鴛下者宜出財以佐軍如是則強國不犯之道也臣願與子男及臨菑習弩博昌習船者請行死之以盡臣節

與摯伯陵

司馬遷

遷聞君子所貴乎道者三太上立德其次立功其次立言伏惟伯陵材能絕人高尚其志以善厥身冰清玉潔不以細行苛累其名固已貴矣然未盡太上之所由也願先生少致意焉

與江都王女弟徵臣

魯恭王后

國中口語籍籍慎無復至江都

遺廣陵王

劉延壽

願長耳目後人有天下

與魏相

丙吉

朝廷深知弱翁行直方且大用願少慎事自重藏器於身不顯其能

與某公

張敞

蒼蠅之飛不過十步自托騏驥之尾乃騰千里路然無損於騏驥使蒼蠅絕羣也

與嚴延年

張敞

昔韓盧之取狡兔也上觀下獲不甚多殺願少卿少緩  
誅罰思行此術

與朱邑

張敞

明主游心太古廣延茂士此誠忠臣竭思之時也直敞  
遠守劇郡馭於繩墨胸臆約結固亡奇也雖有亦安所  
施足下以清明之德掌周稷之業猶饑者甘糟糠穰歲  
餘梁肉何則有亡之勢異也昔陳平雖賢須魏倩而後  
進韓信雖奇賴蕭公而後信故事各達其時之英俊若

必伊尹呂望而後薦之則此人不因足下而進矣

與子琳

孔臧

告琳頃來聞汝諸友生講肄書傳孜孜晝夜衍衍不急  
善矣人之進退惟聞其志取必以漸勤則得多山澗至  
柔石為之穿蝸蟲至弱木為之弊豈非漸之致乎

答張敞

嚴延年

河南天下喉咽二周餘斃莠盛苗穢何可不鉏也

上漢宣帝

烏孫公主

年老土思願得歸葬漢地

誠子

劉向

汝非有厚德蒙恩甚厚將何以報董生有云弔者在門  
賀者在閭言有憂則恐懼敬事敬事則必有善功而福  
至也又曰賀者在門弔者在閭言受福則驕奢驕奢則  
禍至故弔隨而來齊頃公之始籍霸者之餘威輕侮諸  
侯虧蹇蹇之容故被鞏之禍遁服而亡所謂賀者在門  
弔者在閭也兵敗師破人皆弔之恐懼自新人皆愛之



諸侯皆歸其所奪邑所謂弔者在門賀者在閭也

與段會宗

谷永

足下以柔遠之令德復興都護之重職甚休甚休若子  
之材可優遊都城而取卿相何必勤功昆山之側願吾  
子因循舊貫勿求奇功終更亟還亦足以復鴈門之跡  
萬里之外以身為本願詳思愚言

與蓋寬饒書

王生

明主知君潔白公正不畏彊禦故命君以司察之會擅

君以奉使之權尊官厚祿已施於君矣君宜夙夜惟思  
當世之務奉法宣化憂勞天下雖日有益月有功猶未  
足以稱職而報恩也自古之治三王之術各有制度今  
君不務循職而已迺欲以太古久遠之事匡拂天子數  
進不用難聽之語以摩切左右非所以揚令名全壽命  
者也方今用事之人皆明習法令言足以飾君之辭文  
足以成君之過君不惟漢氏之高蹤而慕子胥之末行  
用不訾之軀臨不測之險竊為君痛之夫君子直而不

挺曲而不詘大雅云既明且哲以保其身狂夫之言聖人擇焉唯裁省覽

報漢元帝

王嬙

臣妾幸得備員禁衛謂身依日月死有餘芳而失意丹青遠竄異域誠得捐軀報主何敢自憐獨惜國家黜陟移於賤工南望漢關徒憎愴結耳有父有弟惟陛下幸少憐之

與韋玄成

按事丞相史

古之辭讓必有文義可觀故能垂榮於後今子獨壞容貌蒙恥辱光曜晦而不宣微哉子之所托名也僕素愚陋過為宰相執事願少聞風聲不然恐子傷高而僕為小人也

上趙后

昭儀

天地交暢貴人姊及此令吉光登正位為先人休不堪喜豫謹奏三十六物以賀金屑組文茵一鋪沉水香蓮心椀一面五色同心大結一盤鴛鴦萬金錦一匹琉璃

屏風一張枕前不夜珠一枚含香綠毛狸席一鋪通香  
虎皮檀象一座龍香握魚二首獨搖寶蓮一鋪七出菱  
花鏡一奩精金驅環四指若亡絳綃單衣一襲香文羅  
手籍三幅七回光雄昉髮澤一盞紫金被褥香鑪三枚  
文犀辟毒筋二雙碧玉膏奩一合

荅桓譚

揚雄

長卿賦不似從人間來其神化所至耶大諦能讀千賦  
則能為之諺云伏習衆神巧者不過習者之門

與劉良

梁丘賜

老子不率宗族單袴騎牛哭且行何足賴哉

詣闕上書

寧陽主簿

臣為陛下子陛下為臣父臣章百上終不見省臣豈可  
北詣單于以告怨乎

遺武帝

匈奴狐鹿孤


南有大漢北有強胡胡者天之驕子也不為小禮以自  
煩今欲與漢闔大關取漢女為妻歲給遺我藥酒萬石

稷米五千斛雜繒萬匹他如故約則邊不為盜矣

上書宣帝

烏孫昆彌

連為匈奴所侵削昆彌願發國半精兵人馬五萬匹盡  
力擊匈奴唯天子出兵哀救公主



文章辨體彙選卷二百五十九